

la Marcha *aliter* chiamato el Gran Diavolo, *cum* grandissimo numero de archibuxi diti barche. Era uno seraio da meter a qualche passo, et se poteva serarli dentro quatrocento homeni d'arme et 5 milia fanti, quali seriano molto sicuri; et facendo li sui reperi, potriano molto ofender li sui inimici et da loro haver pochissimo danno, et bixognava a condure dite barche 30 in 40 carete. El soprascrito missier Roberto se atrovava nel dito campo, *cum* dui sui fioli et molti altri boni capetanii et gran signori de Franza. *Item*, la più parte de li foriinsiti del stado di Milan, quali erano in grandissimo numero, quali tutti potevano essere uno exercito de 30 milia persone. A di 31, lozò dito campo ad uno vilazo chiamato la Pieve del Cairo; a di primo Zugno a San Zorzi; a di 2 al Borgo; a di 3 a Guonolengo; a di 4, che fu el sabato, el campo lozò soto Novara, et fu piantata l'artelaria, la qual comenzò a bater li muri de la tera, et per quel zorno ne fu butato uno grandissimo pezo per tera, per modo che l'era asai per dar la bataglia. Dentro de Novara era el ducha de Milano et el signor Zuane fratele dil marchexe de Mantoa, *cum* alcuni altri signori del stado de Milan de la parte del dito Ducha, et da circha 4 milia sviceri fati prexoni da vivere per doi zorni. Et tanto piu che el Ducha non mancava de tore el piu de le vituarie el poteva per fornir el castelo, dubitandose ad ogni modo non poter defender la terra. Et fece *etiam* portare tutta l'artelaria et munition el se atrovava nel dito castelo; erano tre o quatro pezi, quali el lassò su li muri per tirar a la volta del campo del Re, et uno grosò canon, quale steva sempre a la porta, la qual non fu mai serata. Et questo isteso *etiam* fu referito per alcuni de li primi zentilhomeni di Navara, quali fuziteno nel campo del Re. Quela sera, a circha hore 23, saltò fora alcuni svizzeri et fono a le man *cum* li franzoxi, per modo che se ritirono diti sviceri ne la tera; franzoxi montorono fino su li muri; che se haveveno voluto allora dar la bataglia a la tera, cadauno iudica l'haveriano presa; in dieta scaramuza ne sono morti alcuni sviceri et francesi. La matina seguente, che fu la domenega, tirono *etiam* l'artelaria facendo gran danno a la tera. Et non par a quelli lochitenenti del Re dar l'asalto a la tera, et questo perchè el non se poteva fare senza la morte de grandissimo numero de zente de l'una parte et de l'altra et senza la ruina de la tera, la quale avea mandato a dire a li prefati lochitenenti che non desiderava alcun che renderse a la Christianissima Maestà; ma perchè sviceri erano piu forte che loro, non lo potevano fare, et tanto piu che fran-

244
 cexi erano certissimi che sviceri non potevano stare doi zorni in la tera, perchè li mancava ogni vituaria. Subito da poi disnar, diti lochitenenti fono advertiti, per bona via, come el veniva 3 milia sviceri in soccorso de Novara et a trovar el Ducha, quali dovevano arivar quela sera over el zorno seguente; et però fu ordinato che el campo se dovesse levar et andar a lozar a Trechè, che era uno molto bon alozamento per el campo, et poi *etiam* per romper la strada a diti 3 mila sviceri che non andaseno a conzonzersi *cum* li altri che era in Navara. Et cussi andono li maistri del campo a segnar li alozamenti a Trechè, et el campo se aviò in ordinanza per andarsene a Trechè. El parse mo a monsignor de la Tramoglia, per haver intexo allora de lo alozar el campo, che poco avanti sviceri erano pasati, de non lozar piu a Trechè ma a la campagna tra Trechè et Novara da la banda de Milan; et non obstante che el signor Zuan Giacomo et el clarissimo missier Andrea lo desconsigliaseno de questo, *tamen* lo volse fare, et cussi lozò el campo a campagna. El clarissimo missier Andrea, quale era zà a Trechè, volse andar alozare dove era il campo; ma quei lochitenenti, perchè l'era zà lozato, non volse el se partise de li ma restase lì a aspettar monsignor el zeneral, quale doveva venir la matina seguente a bonora *cum* li danari, alozar a Trechè. Sviceri essendo adoncha uniti et non havendo victuarialcuna, veneno la matina seguente, a l'alba, fora de la tera per asaltar el campo francese et per esserli forza a combater. Et veneno in questo modo, zoè in dui squadroni: uno de 3 milia et uno altro de 4 milia. Dito squadron de 3 milia se partì per mostrarsi piu grosò a la volta del campo, el quale subito, per esser stà scoperto da le guardie, comenzò a tirar l'artelaria; l'altro veramente de 4 milia se discostò alquanto de la strada et se ne veniva per certi fosi el piu secreto potevano, *tamen cum* tanto ordine quanto è possibile a dire. Aldando adoncha el clarissimo missier Andrea a tirar l'artelaria, montò a cavalo per intender quello si faceva nel campo, et se ne andò per la strada dove era lozato el campo, et visto dito squadron de 4 milia, et credando fuseno zente francese, se aviò verso dito squadron et se aproximò fino ad uno tirar de petra, et cognoscendo che erano inimici, se messe a traversar la strada, et in questo li fu deserato alcuni sciopeti et archibuxi, ma non fu svicero che se metese fora del suo ordine. Et se messe el sopradito clarissimo missier Andrea su una strada dove se poteva benissimo veder il fato d'arme, et perchè sviceri erano tra esso et francesi, non fu possibile el se potesse conzonzer *cum*